

թիւն դարերի: Պահանջները փոխտելով, նա փոխեց եւ իր պարապմունքների ձեւը: Արեան հետ խաղացող մարդը այժմ զբաղուած էր երկրի մշակութիւնով:

Նա իր տան լուսամուտներից ամէն օր տեսնում էր Ոստանի հին ամրոցի ակերակները, տեսնում էր իր նախահարց, Ղարա-Մելիքների, խորտակուած իշխանութեան բեկորները: Նա այդ փլատակների մօտ հիմնեց ոչ թէ ամրոց, այլ մի տուն, որ գիւղատնտեսական բոլոր յարմարութիւններն ուներ: Նրա նախնիքը ժողովուրդ էին կառավարում, իսկ նա կառավարում էր այժմ մի բարեկարգ, օրինակելի տնտեսութիւն:

Տան գլխավոր դռան սեմի մօտ, որ նայում էր դէպի պարտեզը, նստած էր մի պառաւ կին: Վաղորդեան արեգակի ջերմ ճառագայթները կորչում էին նրա պղնձեայ դեմքի խորին կնճիռների մէջ: ճերմակ յօնքերի երկար մազերը, միախառնտելով դեռ իրանց սեւ գոյնը պահպանած թերթերունքների հետ, մի առանձին վստմութեան էին տալիս նրա խորախորհուրդ աչքերին: Նա նստած էր անշարժ, որպէս մտածութեան արձանը: Նայում էր դէպի գեղեցիկ պարտեզը, ուր աշխատում էր Կարօն: Նայում էր դէպի սիրունիկ երեխաները, որ պտտւում էին նրա շուրջը, նայում էր դէպի կանաչ լայնածաւալ անդաստանները, որ Կարօյի մշակութեան արդիւնք էին, նայում էր դէպի բլուրների վրայ արածացող անասունները, որ Կարօյի ախոռատնից էին դուրս եկել: Նայում էր, եւ պառաւի երկար տարիներով վշտացած սիրտը լցւում էր անսահման մխիթարութեամբ: Որքա՛ն տանջանք, որքա՛ն հալածանք էր կրել այդ զառամեալ պառաւը... որքա՛ն թափառել էր նա... իսկ այսօր տեսնում էր իր դառն աշխատութիւնների քաղցր պտուղը եւ ուրախանում էր:

Դա պառաւ Սուսանն էր:

Այստեղից երեւում էր գիւղը: Առաւօտեան կիսամռայի մէջ նա ակելի գեղեցիկ էր երեւում: Այլեւս հին, գետնափոր խրճիթները չկային: Այնտեղ, ներքեւում, մի հովտածէւ տափարակի վրայ, մինը միւսի մօտ՝ շարքով բարձրանում էին ծառագարդ տները, ուղիղ եւ լայն փողոցների վրայ: Շինական կոկիկ եկեղեցին, նրա մօտ դպրոցի շէնքը, աչք էին շլացնում: Առողջ գիւղացիները մաքուր հագնուած, իւրաքանչիւրը գոհ եւ ուրախ, դիմում էին իրանց գործին: Կարծես, ամէն օր այդ մարդկանց համար տօն էր, կարծես, նրանք երբեք վիշտ ու նեղութիւն չէին տեսել:

Պառաւը շարունակում էր նայել: